

**Radunanza generala dal CAS EB, ils 20 da mai 2011
aint illa sala da gimnastica a Strada**

Tractandas

1. Protocol da l'ultima radunanza dals 26 avrigl 2010 a Lavin
2. Rapport da la presidenta
3. Rapports dals differents schefs
4. Rendaquint 2010 e rapport dals revisuors
5. Contribuziun annuala da commembranza
6. Tschernas
demischiunà: schef da gitas, Christian Wittwer
7. Onurificaziuns dals veterans
8. Alp Sprella: Preschantaziun dal proget ed infuormaziuns actualas
9. Varia

Nossa presidenta Gianna Rauch Poo driva la radunanza generala a las 20.00h e po salüdar a 58 commembers/bras. Davo divers salüds speziels salüda ella a Men Notegen, il capo da cumün da Tschlin. El dà il bivgniaint uffizial dal cumün e surpiglia al listess mumaint la prüma runda da bavrondas. Ün cordial grazcha fich al cumün da Tschlin. Men Notegen infuormescha cha no das-chain dovrar l'archiv dal cumün da Tschlin sco nouv archiv dal CAS.

Divers commembers/ bras s'han laschè s-chüsar in scrit o a bocca. Sco dombravusch funcziuna Fritz Felix da Susch.

1. Protocol da l'ultima radunanza generala dals 26 avrigl 2010 a Lavin

Il protocol vain preelet ed approvà cun applaus.

2. Rapport da la presidenta

Nossa presidenta rapportescha sur da sia lavur sco presidenta dal CAS EB. La suprastanza ha fat diversas tschantadas dūrant l'on scuors e la presidenta es statta a sezzüdas our da la val per seguir la politica federala e chantunala dal CAS. Blera lavura ed adüna darcheu sezzüdas haja dat cul proget da l'alp Sprella.

Sco nouv guardia chamonna da la chamonna Linard vaina elet a Sep Erni chi ha fingià cumanzà sia lavur da preparaziun cun grond schlantsch. Per nossas chamonnas ha la suprastanza adüna darcheu lavurs, pero qua vaina eir ün grond sustegn da nos schef da chamonnas.

No vain fat müdada cun nos archiv da S-chadatsch aint il archiv da cumün Tschlin. Nos archiv es in ün fich bun stadi, grazcha a l'agüd da Tomas Herrmann chi ha archivà tuot.

Ün grond cumplimaint va per il nouv layout dal cudeschin ed ün grazcha fichun a Christina Willy e Chasper Ans Gaudenz per lur buna e bella lavur. Uossa stuvaina amo surelavurar nossa pagina dad internet e tilla adatar al nouv layout.

Da surelavurar sun eir nos statüts chi nu sun plü dal tuot à jour.

Cun data dals 28 favrer d'eiran inscrit 887 commembers in nossa società. Grazcha a tuots per lur sustegn e fideltà.

Gianna ingrazcha als guardgia chamonnas da Tuoi, Lischana ed eir a tuots da la Linard, als schefs da chamonnas, a la grupp da salvamaint, a la grupp da chans, als manaders dals CAS e OJ cul coach, revisuors da quint, als redactors da nossa gazettina ed al redactor da la pagina d'internet. Ün ingrazchamaint eir a la suprastanza per la lavur prastada a favur da nossa secziun.

I circulescha üna glista cun tuot ils nouventrats ed ils sortits, - tals sun eir manzunats aint in nos cudeschin no 43 - uschè cha Gianna desista da tils preleger. Gianna dà ün cordial bainvgnü a tuot ils nouventrats.

Da duos commembers vaina stuvü tour cumgià per adüna, quai sun Osvaldo Bernetta e Mathias Rizzi. La radunanza s'adozza in lur memoria.

Il rapport da la presidenta vain approvà cun applaus.

3. Rapports dals differents schefs

3.1 Schef da salvamaint

Jöri Felix rapportescha sur da sia lavur sco schef da salvamaint. Nos nouv magazin cun il material da salvamaint as rechatta aint in ün container our il areal da l'Uffizi da construcziun bassa dal chantun. Curdin Egler es il nouv schef da material e Corradin Arquint seis substitut.

Chasper Planta quinta cun purrets impreschiunants dad ün salvamaint da l'inviern passà sül Piz Minschun.

3.2 Schef da gitas

Dürant l'on scuors d'eira la partecipaziun e las frequenzas illas differentas gitas sten bunas. Eir schi d'eiran viadis plü lungs nu tegna quai inavo ils partecipants. Flot esa cha eir plü giuvens piglian darcheu part a las gitas. Christian finischa sia incumbensa sco schef da gitas.

3.3 Schef OJ

Quels dal OJ han passantà üna sairada cumünaivla pachifiga ed allegraivla sü Vastur. L'interess vi da las gitas dal OJ d'eiran al principi dal on plütost pitschen. Tant plü allegraivel d'eira illura l'augmoint dals partecipants pro'l rampignar. Accidaints nun haja dat per furtüna ingüns.

3.4 Schef da chamonnas

Duri Roner rapportescha sur da sia lavur sco schef da chamonnas. Las pernottaziun illas differentas chamonnas d'eiran per il 2010 illa media dals ultims ons.

Sülla chamonna Lischana vaina adüna darcheu ün problem cun l'electricità. Heinz Gross ha fat ün annalisa da l'implant electric per verer ingio chi dess amo potenzial per ameglrdar la

situaziun. La lavur cumüna sülla Lischana es gnüda organisada da Christian Juon. I füss da signalisar nouv la senda sur Rims, chi chi ha interess dess s'annunzchar pro Duri.

Dodo Boss illa chamonna Tuoi fa fich buna lavur. Eir là esa gnü fat lavur cumöna organisada da Not Armon Willy. La culur dals uschöls spletscha, magari cha'ls veterans han amo üna jada cumpaschiun cun tals e tils mettan ad ir.

Rico Luppi ha desdit davo 15 ons sia plazza sco guardia chamonna da la Linard. Elet cun applaus vain Sep Erni per quist'incumbensa. Ün grond grazcha fich va a tuot ils voluntaris per lur grond ingaschamaint sülla Linard. Previs esa da munir ils lets cun plümas ed i larà eir ün nouv telefon per garantir adüna ün bun contact cun la val. Nouv transporta il taxi da Lavin a Plan da Bügl la gliעד eir in marcurdi e quai eir be singulas persunas.

Ils rapports dals differents schefs vegnan acceptats cun applaus.

4. Rendaquint 2010 e rapport dals revisuors

Il rendaquint è'l rapport dals revisuors sun publichats aint illa gazetina. Il quint da gestiun 2010 muossa ün vanz da sfr 835.77. La facultà netta als 31.12.2010 s'augmainta sün sfr 202'178.46. Andri declera cuort il rendaquint ed eir il quint da gestiun.

Sülla Linard vaina pudü generar be sfr 10'836.50 entradas cul custodi. In congual culs oters ons plütost pac.

Pro las sortidas vaina gnü cuosts generals da frs. 27'935.55. Quai sun raps cha no vain dovrà impustüt per il proget Alp Sprella.

Ils revisuors da quint ingrazchan in lur rapport al chaschier per sia gronda lavur e propuonan acceptaziun dal quint 2010.

Il rendaquint 2010 vain acceptà cun unanimità da vuschs e la radunanza generala dà discharg a la suprastanza.

5. Contribuziun annuala da commemoranza

Per la contribuziun annuala dal 2011 propuona la suprastanza il seguaint sco fin qua:

frs. 28.--	l'on per singuls commembers
frs. 56.--	l'on per famiglias
frs. 15.--	l'on per giuvenils in famiglias na commembras

La radunanza generala fa bun quista proposta.

6. Tschernas: demischiunà sco schef da gitas a Christian Wittwer

Christian Wittwer - chi d'es in carica daspö il 2004 sco schef da gitas - ha demischiunà. Alfons à Porta da La Punt Chamues-ch as metta a disposiziun sco successur ed as preschainta cuort svesa.

Alfons vain elet cun applaus.

7. Onurificaziun dals veterans

Onurificaziuns vaina differentas quist on:

25 ons commembers sun: Maja e Men Bischoff da Sent, Alfons Filli da Zernez, Leo Caduff da Zernez, Walter Abderhalden da Zernez, Marco Müller da Scuol, Chasper Planta da Sent, Andri Gritti da Sent, Clà Duri Janett da Tschlin, Tinet Michel da Valchava, Hans-Peter Rubi da Guarda.

40 ons commembers sun: Urs Könz da Lavin, Flurin Steiner da Lavin, Christian Juon da Sent, Wilfried Zimmer da Kreuzlingen.

50 ons commembers sun: Domenic Parolini da Scuol, Jon Plouda da Ftan, Jürg Steiner da Uetikon a. See, Irma Egler da Lavin.

60 ons commember es: Baltisar Messmer da Samedan.

La presidenta surdà a tuot ils veterans manzunats i'l rapport üna medaglia resp. ün diplom e tils ingrazcha fich per lur gronda fideltà.

8. Alp Sprella: Preschentaziun dal proget ed infos actualas

Raduond 7 büros d'architectura as vaivan interessats per il proget Alp Sprella. La schelta nu d'eira dal tuot simpla. Tschernü es gnü il büro dad Urs Padrun da Guarda.

No vain laschà far ün stüdi da l'ambient. Quist stüdi es gnü a la conclusiun cha l'influenza sün la natüra cun ün menagi da la chamonna eir d'inviern füss enorm gronda. La suprastanza ha in seguit decis cha la chamonna gnis custodida be d'ürant la stà. No vain eir dat dad elavurar ün concept per la repartizun dals visitaders, tant per evitar plü ferm pussibel conflicts tanter peduns e velocipedists, ma eir per diminuir las influenzas negativas da las persunas per flora e fauna. Previs esa dad infuormar fich bain cun tablas d'infuormaziuns, da signalisar bain las sendas, cha'ls velos restan süllas vias previssas etc.

No vain fat üna maisa raduonda cun las organisaziuns da l'ambient sperond chi nu fetschan recuors sün nossa dumonda da fabrica.

A Heinz Gross da Zernez vaina elet sco president da la cumischiun da fabrica.

In october 2010 es gnü profilà il proget. In schner 2011 d'eiran avant mans tuot ils resultats dals differents stüdis e davo quai vaina inoltrà la dumonda da fabrica.

Las organisaziuns da l'ambient han inoltrà üna procedura da partecipaziun. No sperain dad avoir üna resposta impegnativa fin d'utuon scha no pudain fabricar o bricha.

Andrea Gilli - coordinatur regiunal da la regiun Parc Naziunal - less sustgnair noss'idea eir da la vart da la politica.

Urs Padrun es preschaint quista saira e declera a man da plans, purtrets ed ün model sco cha l'alp ventura pudess verer oura.

9. Varia

- Gianna ingrazcha a Christian per seis ingaschamaint aint illa suprastanza daspö il 2004. No sperain da pudair tour part eir da quinder inavant a sias gitas manadas. Nossa presidenta surdà ün bun da regal.

- Ün grond ingrazchamaint va eir a Rico Luppi e a sia duonna per lur ingaschamaint sülla chamonna Linard e per tuot sia lavur prestada per la secziun. Il regal til manaina a chasa.

- Chasper Ans Gaudenz s'allegra per mincha contribuziun per la gazettina cun maximal 1000 gustabs ed üna fin duos fotografias.

Avant sco serrar la radunanza ingrazcha la presidenta al Coro da Strada per metter ad ir la sala, per l'ustaria organisada exemplaricamaing e pel bel concertin d'ürant la radunanza.

La presidenta serra la radunanaza a las 22.15h e giavüscha a tuots ün bun arriv a chasa.

Scuol, ils 13 favrer 2012

Per il protocol:

Corsina Feuerstein Betschart
actuara

Gianna Rauch Poo
presidenta